

А. АБДУФАТТОҲ.

Вилоят ҳокимининг матбуот хизмати хабар қилади:

БОШ ВАЗИР ЎРИНБОСАРИ – ВИЛОЯТИМИЗДА

ҚР Бош вазирининг ўринбосари Серик Жуманғарин хизмат сафари билан вилоятимизга ташриф буюриб, Сайрам ва Ўрдабоши туманларини оралаб, тадбиркорлар билан учрашди. Вилоят ҳокими Дархан Сатибалди минтақада мол бўрдоқлаш, гўшт экспорти, иссиқхона ҳўжалигидаги лойиҳалар ҳақида маълумот берди.

Бош вазир ўринбосари раҳбарлигидаги гуруҳ Сайрам туманидаги «Nurym Group» МЧБда бўлиб, корхона фаолияти билан танишди. Улар замонавий “Қайып ата” кушхонасининг иш жараёнини кўздан кечиришди. Бу ердан чет мамлакатларга гўшт экспорт қилинмоқда. Тадбиркор Сирим Ертаев лойиҳаларини қўллаб-қувватлашларини сўранди. Бош вазир ўринбосари ва минтақа раҳбари Ўрдабоши тумани, Бадам қишлоғида жойлашган “Берте Милка” сутчилик фермасига ҳам боришди. Юзга яқин киши иш билан таъминланган фермада сут етиштирилиб, қайта ишланади. Вазир муовинига корхонанинг янги лойиҳалари таништирилди, тадбиркорлар фикрлари тингланди. Серик Жуманғарин ва вилоят ҳокими Дархан Сатибалди Шубар қишлоғида



сабзавотчилик билан шуғулланадиган “Тутебаев Мейрамбек” иссиқхона мажмуасида бўлишди. 10 гектар майдонни эгаллаган мажмуанинг сармоявий қиймати – 300 млн. тенге. Иссиқхона ҳўжалиги билан шуғулланадиган тадбиркорлар билан учрашган делегация аъзолари ишга салбий таъсир кўрсатадиган омилларни ошқора айтиш мақсадга мувофиқлигини ва хусусий тадбиркорлик давлат томонидан қўллаб-қувватланишини таъкидлашди.



ИМКОНияТЛАрдан ТўЛА ФойДАЛаниш, ХАЛҚ ФАРОВОНЛИгини ЯНАДА ОШИРИШ – БОШ МАҚСАД

(Давоми. Боши 1-бетда).

Лойиҳа ташаббускори ва ижроچиси “Туркистон” ижтимоий-тадбиркорлик корпорацияси, ҳамкори “М-Адал” МЧБ. 1 гектар майдонда жойлашган омбор 2024 йилнинг биринчи ярмида фойдаланишга топширилади. Саврон тумани худудидаги мазкур омборда 4 минг тонна сабзавот сақланади. 35 киши иш билан таъминланади. – Мамлакатимизнинг барча жойларида бўлгани сингари Туркистон вилоятида ҳам ҳали фойдаланилмаган имкониятлар кўп. Уларни ишга тушириб, қўшимча даромад топиш, халқимиз фаровонлигини янада ошириш мумкин. Бунинг учун одамларда тадбиркорликка қизиқишни кучайтириш, томорқадан унумли фойдаланиш керак. Юртимизда озиқ-овқат хавфсизлигини таъминлашга, аҳолига арзон ва сифатли маҳсулотлар етказиб беришга алоҳида эътибор қаратилмоқда. Шу мақсадда деҳқончилик тобора ривожлантирилиши керак, – деди Бош вазир ўринбосари. Серик Жуманғарин шу ерда бир гуруҳ нуронийлар билан суҳбатлашди. Улар вилоятимизнинг барча ҳудудларида амалга оширилаётган тизимли ислохотлардан, ўзгаришлардан одамлар рози эканини қайд этишди. Бош вазир ўринбосари вилоятда ишлаб чиқариш соҳасида амалга оширилаётган лойиҳалар билан ҳам танишди. Жорий йилда вилоятда саноат маҳсулотлари ишлаб чиқариш ҳажми 681 млрд. тенгени ташкил этди (4,7 фоизга ўсди). Қайта ишлаш саноатида жорий йилда умумий қиймати 30 млрд. тенгелик 20та лойиҳани амалга ошириш ва 594та иш ўрни яратиш режаланган. Йил бошидан буён 12та лойиҳа ишга туширилиб, янги иш ўринлари очилди.

ВАЗИР АҲОЛИ БИЛАН УЧРАШДИ

Туркистон вилоятига иш сафари давомида Экология ва табиий захиралар вазирини Ерлан Нисанбаев вилоят аҳолиси билан учрашув ўтказди ва уларнинг саволларига жавоб берди. Учрашувда вилоят ва туман ҳокимликлари, вазирликнинг ҳудудий бошқармалари, вилоят ҳокимлиги бошқармалари вакиллари, нодавлат-нотижорат ташкилотлари раҳбарлари иштирок этди. Йигилиш бошқарма ва вазирликнинг расмий интернет-тармоқларида жонли эфирда намоиш этилди. Учрашувдан сўнг вазир матбуот анжуманида ОАВ вакиллари қизиқтирган саволларга жавоб берди ва фуқароларни шахсан қабул қилди.

Туркистон вилоятига хизмат сафари билан ташриф буюрган Қозоғистон Республикаси Экология ва табиий захиралар вазирини Ерлан Нисанбаев ва вилоят ҳокими ўринбосари Ермек Кенжеханули Хожа Аҳмад Яссавий университетининг ботаника боғига ташриф буюришди.

Университет ректори Жанар Темирбекова боғнинг фаолияти билан таништирди. 29 йил муқаддам Аҳмад Яссавий университетиди 88 гектар майдонни эгаллаган “Ботаника боғи” ташкил этилган эди. Унга мамлакат ва қўшни мамлакатлардан 127 турдаги манзарали, мева, дарахт-бута ва гулли ўсимликлар ўтказилган. Ерлан Нисанбаев шаҳардаги “яшил белбоғ”ни кўздан кечирди ва олиб борилаётган ишлар билан танишди.

ВАЗИР ОБОДОНЛАШТИРИШ ИШЛАРИ БИЛАН ТАНИШДИ



ҚОЗОҒИСТОН ВА РОССИЯ: ҲАМКОРЛИК МАСАЛАЛАРИ КҮН ТАРТИБИДА



Туркистон шаҳрида вилоят тадбиркорлик ва саноат бошқармаси ҳамда “Туркистон INVEST” МЧБ ташкилотчилигида ҚР ва Россия Федерацияси ўртасидаги ҳамкорлик бўйича ҳукуматлараро комиссиянинг навбатдаги йиғилиши ўтди. Тадбирда икки мамлакат ўртасидаги ҳамкорлик ва савдо масалалари муҳокама қилинди. Учрашув якунида делегация вакиллари маданий дастурлар билан танишди.

“ҚОЗОҒИСТОННИНГ ЭНГ ЯХШИ МАҲСУЛОТЛАРИ” ТАНЛОВИ

Астана шаҳрида ўтган “Қозоғистоннинг энг яхши маҳсулотлари” республика кўрик-танловида 180та корхона вакиллари иштирок этди, улардан 9 нафари туркистонлик тадбиркорлар. Анъанавий кўргазма-ярмаркада энг сара маҳсулотлар шаҳар аҳолиси ва меҳмонлари эътиборига ҳавола этилиб, танлов ғолиблари аниқланди.



СЎЗОҚДА КЎКАЛАМЗОРЛАШТИРИШ ИШЛАРИ АВЖИДА

Сўзоқ туманида оммавий шаңбалик ўтказилди. Унда барча муассаса ходимлари, тадбиркорлик субъектлари соҳиблари, туман аҳолиси иштирок этди.

Тозалаш ишларига 1480 киши сафарбар қилиниб, 13та махсус техника иштирок этди. Натижада, 38 қақирим кўча ва 11 қақирим пйёдалар йўлаклари тартибга келтирилди.

“Энг яхши халқ истеъмоли маҳсулотлари”, “Энг яхши озиқ-овқат маҳсулотлари” номинациялари бўйича ғолиблар аниқланди. Вилоят миқёсида энг яхши корхона, деб эътироф этилган “Энг яхши саноат маҳсулотлари” номинацияси ғолиблари – “Мега-Агат” МЧБ, “Кентов трансформатор заводи” ва “Батсу Водоканал” МЧБлар танловда минтақамиз шарафини ҳимоя қилишди. Шунингдек, “Энг яхши халқ истеъмоли маҳсулотлари” номинацияси ғолиблари – “Бекзат Бак” МЧБ, “Asia Brand” ХК, “Арай” ИЧШ, “Энг яхши озиқ-овқат маҳсулоти” номинацияси бўйича ғолиб – “Балмўздақ” МЧБ, “Майлыкент Сўт” ҳамда “Алекс” МЧБнинг маҳсулотлари ҳам тақдим этилди. Шунингдек, пойтахтимиз аҳолиси ва шаҳар меҳмонлари “Бир қишлоқ – бир маҳсулот” лойиҳаси бўйича “Қозоғистоннинг энг яхши маҳсулоти – 2023” ҳудудий кўргазма-танловида иштирок этган тадбиркорлар маҳсулотларига катта қизиқиш билдиришди.

Шунингдек, Қўлоққўрғон – Туркистон йўналишидаги “Яшил белбоғ” худуди тозаланди. Ижтимоий иншоотлар ҳовлилари, истироҳат боғлари ва “Яшил белбоғ” худудига 2480 туп дарахт кўчатлари ўтказилди. Дам олиш кунларида 70 тоннадан зиёд ахлат махсус чиқиндиҳоналарга ташилди.

»»» Тайинлаш



БОШҚАРМА РАҲБАРИ ТАЙИНЛАНДИ

Миллий хавфсизлик қўмитасининг Туркистон вилояти бошқармаси раҳбари лавозимига миллий хавфсизлик генерал-майори Бўлат Аюбайули Қалмурзаев тайинланди. Бунгача у Миллий хавфсизлик қўмитасининг Қизилўрда вилояти бошқармасининг бошлиғи лавозимида фаолият юритган.

341 МИНГ ТОННА МОЛ ОЗУҚАСИ ТАЙЁРЛАНДИ

Ўрдабоши туманида ем-хашак тайёрлаш режаси бажарилди.

Туман ҳокими Азат Ўралбаев қишлоқдаги чорвачилик ҳўжалиқларида бўлиб, уларнинг мол қишлоғига тайёргарлигини кўздан кечирди. Жорий йилда туманда 322,9 минг тонна озуқа тайёрлаш режаланган, бугунги кунда 341 минг тонна ем-хашак тахт.



»» Газетхон хонадон – жамият кўрки

Ғанимат ва Рўза Рўзиматовлар оиласи Тўлебий туманидаги ибратли оилалардан. Ғанимат Рўзимат ўғли катта-ю кичикка бирдай маслаҳатгўй. Ширин сўзлари одамлардан аямайди, уларга интилади, самимий ва дилкаш гурунглар қилади. Унинг ўзи каби суҳбатлари мазмунли, гурунглари қизиқарли. Бу инсон билан бир бор суҳбатлашган кишининг яна мулоқотда бўлгиси, яна дийдорлашгиси келади...

Отахоннинг хотирасига ҳавас қилса арзийди. Салкам етмиш йиллик тарихни яхши билади. У баъзи воқеаларни йили, ойи, ҳатто кунигача аниқ айтиб бера олади. Ғ. Рўзиматовнинг ҳаётида яхши-ёмон кунлар ҳам ўтган.

Ғанимат ака тиббиёт ўқув юртини тамомлаб, мактабда тиш доктори, Шимкент шаҳридаги телеминорада муҳандис, “1 Мамир” давлат хўжалигида 37 йил радиотехник сифатида фаолият юритди, шу ердан нафақага чиқди.

Рўза опа 1977 йили университетни тамомлаб, Шимкентдаги 21-сонли матабда, сўнг 41 йил Киров – ҳозирги Ал Форобий номли мактабда муаллималик қилди. Фарзандлари Баҳром – савдо соҳасида, Камола ва Жўрабек мактабда ўқитувчи, Шерзод – ҳарбий соҳада хизматда. Рўзиматовлар хонадони ярим асрдан зиёд давр мобайнида намунали оила сифатида эътироф этиб келин-

ОИЛА ҚЎРҒОНИ – МЕҲРУ-ОҚИБАТ

ган. Оила ва фарзандлар тарбияси борасида бу оиланинг ўз тажрибалари ва сабоқлари бор. Тарбиянинг асосий илдизлари миллий анъаналар, қадриятлар билан бевосита уйғунлашиб кетган. Бу оилада азалдан бир-бирларига меҳр-оқибатли бўлиш, ҳар қандай ҳолатда ҳурматларини жойига қўйиш, қадрлаш ҳамда уй-рўзғор ишларида беминнат ёрдам бериш тўғри тақсимланган. Айниқса, ўта мураккаб даврда, энг оғир шароитда ҳам ҳалоллик оиланинг асосий маёғи бўлиб қолган.

– Оиланинг мустақамлиги нимага боғлиқ? Қадимдан оиланинг муқаддас эканлигига алоҳида ургу бериб келинган. Ушбу таърифга сизнинг муносабатингиз қандай? – сўрадик Ғанимат Рўзимат ўғлидан.

– Оилани мен муқаддас қўргон деб биламан. Қўргон қанча мустақкам, бақувват бўлса, унинг ичидагилар шунчалик бехатардир. Нега муқаддас? Чунки Аллоҳ таоло иродаси билан оила ташкил топган ва уни қиёматгача пок тутмоқ бизга буюрилган. Уни мустақкам қилади-

ган ришталардан бири, бу энг аввало ота-онанинг, яъни эр-хотиннинг тотувлигидир. Фарзандларга бола-



ликдан шукронани, меҳнатни, она юрт билан фахрлиниш туйғуларини сингдириш керак.

– Ўзингиз ўсиб-улғайган оила хусусида ҳам сўзлаб берсангиз.

– Отамни Рўзимат баққол дейишган, Тошкентда, Хаста Имом мадрасаси ёнида дўконлари бўлган экан.

Сталин даврида қатағонга учраб, дўконларини ташлаб, Тўлебий туманига келиб қолган экан. Падари бузрукворим ҳам, онам ҳам ҳалол инсонлар бўлган. Биз, фарзандларини ҳам ҳалол ризқ билан боққанлар.

Улар оиланинг ҳақиқий ҳаловати фақат ҳалолликда, деб билганлар. Ҳалол бўлсанг ҳамманинг олдида сўзинг ўткир, юзинг ёруғ бўлади, дердилар. Ҳалоллик ҳаммиша оиламизни асровчи кўргон. У йўқ жойда оиладан барака қочади, вояга етган болаларда меҳр-муҳаббат ва оқибат бўлмайди. Ҳалоллик одамни сабр-қаноатли, инсоф-диёнатли бўлишга ўргатади. Унда ҳикмат кўп...

– Нима деб ўйлайсиз, умуман тарбиянинг ўлчови, мезонлари нималар билан белгиланади? – сўраймиз Рўза опадан.

– Тарбияда танбеҳ ҳам, тергаш ҳам меъёридан ўтмаслиги лозим. Сабр-қаноат қилган оила барака топади, тинч-тотув яшайди. Боланинг ёшига қараб меҳр бериш керак. Унинг орзу-истакларини аниқлаб, амалга ошириш лозим. Оилада, албатта, отанинг нуфузи юксак, шу

билан бирга у ҳар жиҳатдан ибрат бўлиши шарт. Отанинг обрўйи, меҳрига жуда кўп нарса боғлиқ, – дейди устоз.

Бебаҳо неъмат – фарзанд тарбиялаб, уларни жамиятнинг фозил инсонлари сифатида камолга етказган Ғанимат ака ва Рўза опа чин маънодаги оилапарвар инсонлардир.

– Газетхон хонадон – жамият кўрки, деймиз. Сизнинг хонадонингиз Мустақиллик давридан буён “Жанубий Қозоғистон” газетасига ошно...

– Ўқувчиларимнинг мақолалари 70-йиллардаёқ Москвада нашр этиладиган газета-журналларда чоп этилган, улар республика олимпиадаларида ғолиб бўлишган. У пайтда болалар газета ва журналлари ривожланган эди. Кичкинтойлар учун нашрларни кўпайтириш керак. Болаликда газетага қизиққан бола улғайганда, албатта, “Жанубий Қозоғистон”ни мунтазам ўқийдиган бўлади.

Қозоғистонимизнинг тараққий этишида, шубҳасиз, мустақкам ва ибратли оилаларнинг муносиб ўрни ҳамда ҳиссаси мавжуд. Жумладан, Ғанимат ака оиласининг ҳам. Тиланимиз – ҳалолликдан ҳаловат ва ҳикмат топаётган ибратли оилалар кўпаяверсин!

Б. ДЎСМАТОВА.

ОЗАРБАЙЖОНДА ТЕАТР ФЕСТИВАЛИ

Туркистон мусиқали драма театри Озарбайжоннинг Шуша ва Боку шаҳарларида ўтадиган миллат раҳнамоси Гейдар Алиевнинг 100 йиллиги, ТУРКСОЙ ташкилотининг 30 йиллигига бағишланган халқаро театр фестивалида “Кўркит ҳақидаги афсона” спектакли билан иштирок этишади.

Фестивалнинг мақсади – ТУРКСОЙ ва барча туркий халқлар ўртасидаги ҳамкорлик истиқболларини янада кенгайтириш, замонавий театр санъатининг илғор намуналари билан таништириш, халқаро алоқаларни ривожлантириш, янги сахна асарлари машҳур бўлиши учун шароитлар яратиш.

Вилоят ҳокимининг матбуот хизмати.



»» Обуна – 2024

ФАХРИЙЛАР ОБУНАДА НАМУНА



Мамлакатимизда давлат органлари билан бир қаторда турли жамоат ташкилотлари ҳам жамиятдаги тинчлик-осойишталик ва барқарорликни таъминлаш борасида самарали хизмат қилишмоқда.

Бугун мана шундай масъулиятли вазифани сидқидилдан адо этаётган “Тинчлик шартномаси ҳарбий кучлари фахрийларининг “Мўрагер” республика жамоат бирлашмаси ҳақида ҳикоя қилмоқчимиз. 2022 йили 10 ноябрда ташкил этилган ушбу ташкилотнинг филиаллари эндиликда 9та вилоят, учта мегаполисда фаолият кўрсатмоқда. Бирлашма сафида 3 мингга яқин аъзо бор.

Жорий йил март ойдан фаолиятини бошлаган Сайрам туман “Мўрагер” ташкилотининг аъзолари сони эса 200 нафар.

– Мақсад – Ватанга муҳаббатни кучайтириш, мамлакатимиз

сарҳадларини ҳимоя қилиш, аждодлардан мерос урф-одатлар ва миллий қадриятларга ҳурмат уйғотиш, ёш авлодни байналмилаллик руҳида тарбиялаш, – дейди бирлашма раиси М. Алиев. – Шу кунгача Манкент кишлоғидаги Ал Форобий ва А. Навоий номли мактабларда спорт мусобақалари уюштирдик. Шунингдек, бир неча муассасаларда фахрийларимиз билан учрашувлар ўтди.

Бирлашма аъзолари, асосан, Германия, Венгрия, Польша, Чехословакия, Мўғулистон каби давлатларда аскарлик бурчини ўтаган ҳамюртларимиздир. Хусусан, “Мўрагер” бирлашмасининг Сайрам туман филиали раиси Маҳаммад Алиев 1977-1979 йилларда Германияда хизмат қилган. Ҳарбийдан қайтгач, узоқ йиллар Шимкент шаҳрида ҳуқуқ-тартибот идораларида фаолият юритди, ҳозирги кунда у таниқли нотариус. Яқин

кунларда бирлашманинг бир йиллиги нишонланади. Шимкент шаҳрида ўтадиган байрам тадбирига сайрамлик фахрийлар ҳам таклиф этилган.

“Мўрагер” ташкилоти аъзолари Рўзимат Исоқов, Бахтиёр Тўламов, Ҳамрокул Нишонбоев, Мирзараҳим Мирходиев, Худойберган Тожиев каби фахрийлар ташкилот фаолиятига салмоқли ҳисса қўшмоқда, жамоат ишларида фаоллик кўрсатиб, турли хайрия тадбирлари ва акцияларда иштирок этишмоқда.

Жумладан, улар “Жанубий Қозоғистон” газетасини қўллаб-қувватлаб, обунага ҳисса қўшиш ниятида.

З. МҮМИНЖОНОВ.

Тасвирда: “Мўрагер” бирлашмасининг Сайрам тумани филиали аъзолари.

»» Нуқтаи назар

ИНСОН БЎЛИБ КЕЛДИК ДУНЁГА...

Инсон – буюк зот, унинг яратувчиси буюқдир. Аллоҳ таоло буюқлик ва қудратлиликни фақат уни севган ва ёдидан чиқармайдиган зотга ато этган. Аллоҳ таоло яратган барча неъматларнинг энг азизи ва буюғи ҳам инсондир. Оддий қосибдан тортиб, буюк сиймоларгача шу муборак ном билан юритилади. Инсон хоҳ ҳаёт бўлсин, хоҳ ҳаётдан ўтиб кетган бўлсин у, барибир, биз учун азиз ва муқаррамдир. Шу сабабли инсоннинг қадр-қиммати ва хотираси улугʻ ва мўътабардир.

Биз ҳар йили улугʻ кунларда қабристонларга борамиз, ўтганларни ёд этамиз, улар қабри, олдида бош эгиб, таъзим қиламиз. Бу дунёдан кўз юмганлар ҳақиқатан ҳам тупроққа қоришиб кетдилар-у, энди улар қайтиб бош кўтармайдилар. Улар тирикликни абадий тарқ этиб кетдилар, Аслида, бу ёруғ оламга келиш ва ундан кетиш, табиий, албатта. Лекин, бу орада ҳаётдан бевақт кетганлар, зулм қурбонлари, жон фидо қилганлар ҳам оз эмас. Ана шу қисқа умримиз давомида не-не дўстларимиз, азизларимиз, устозларимиз, сиз суҳбатдошларимиз, қариндошларимиз ва ўз падари бузрукворларимиз ва волидаи меҳрибонларимизни йўқотдик, уларни заминга топширдик. Биз, тириклар, улар хотирасини муқаддас биламиз. Азизлар руҳи биз билан, эзгу ишлари-ю, қолдирган меросларига содиқмиз, ижоди-ихтироларига ҳамдам ва ҳамкормиз. Агар уларни унутсак, шаксиз, кофир бўламиз. Инсон қадрини билмайдиган бадбахт кимсага айланиб қоламиз. Чунки, ўтганларни эслаб, уларнинг меҳнати ва ижодий саҳифаларини варақлаб, улардан сабоқ



оламиз, ёшларимизни тарбиялаймиз.

Она заминимиз айланади, одамлар туғилади ва савобли ишлар қилади. Оила, фарзандлар, мансаблар, бойликлар... Дўстлар орттиради, китоблар ёзади, дарахтлар экади, иморатлар, масжидлар қурадилар. Сўнг... Сўнгги йўлга равона бўлади. Ҳаёт йўли қанчалар олис, қанчалар ширин, қанчалар бедаво, доволи бўлмасин, барибир, унинг охири бор. Унга шоҳ ҳам, гадо ҳам, барибир.

Қабристон! Индамаслар диёри, дуру-жавоҳирлар макони. Дунёни ларзага келтирган фотиҳлар, саркардаю паҳлавонлар, алломаю авлиёлар, олим уфузалолар, барча-барчанинг азиз боши қўйиладиган муқаддас замин. Биз қайтиб бош кўтармайдиган абадий макон. Бунда бобомиз, момомиз, қариндошларимиз ва яна, яна қанча қанчалари абадий уйқуда. Улар, гўё, бизга термулиб, қараб туришгандек, биздан нимадир, недир сўрашаётгандек... Аста-аста қабрлар ёнига борамиз, тиловат қиламиз. Баҳор келиши билан қабристон томон йўл оламиз. Сайроқи қушлар хабарини келтирган бу фасп алвон полаларни гуллатиб, сабза поёндозларни тўшайди. Хиёл ўтмай, бинафшалар орасидан руҳлар кўринади. Ассалому-алайкум, меҳрибонларим, пада-

ри бузрукворим, волидаи меҳрибоним! Мен сизларни зиёрат қилгани келдим. Набираларингизга атаб эккан мевали дарахтлар бу йил гуллай бошлади. Боғдаги тераклар кўкка буй чўзмоқда. Хонадонимизда тўйлар бошланаяпти. Сизларга хабар бермоққа келдим, азизларим!

Баҳор фаслида, наврўзи олам арафасида ёхуд Ҳайит кунларида, сиз ҳам қабристонга борганмисиз? Қабрлар устида униб чиққан бинафша-ю, лолақиз-ғалдоқларни кўрганмисиз? Билмасангиз, билиб олинг, азиз дўстим! Баҳор фаслида бинафшалар, лолоқизғалдоқлар биринчи бўлиб қабрлар устидан униб чиқади. Нима учун, нима сабабдан, деб сўрарсиз. Чунки, қабрлар иссиқ бўлади, руҳлар тирик бўлади. Оху-фарёдлар, аламлар, армонлар, орзу тўла қалблар ҳали тўла сўниб етганича йўқ... Боз устига кўёш ҳам ўз нурини ана шу қабрларлар устига биринчи бўлиб сочади.

Товушсиз йиғлаётган полалар сизга не-не ҳикматлардан сўзлагай. Сиз эса эшитмайсиз. Келинг, сабр-қаноат туйғулари ҳамроҳингиз бўлсин. Иймон, инсоф, диёнат ер юзида устувор бўлсин, илоҳим. Марҳумлар ёди юраклар тўрида бўлсин, азизлар!

Соғ ва омон бўлинг!

С. МИРЗО.

Директор – Бош муҳаррир Райимжон Ортиқбой ўғли АЛИБОВЕВ.		Масъул шахслар: Туркистон, Сағрон — Шомирза МАДАЛИЕВ. 8(72533) 2-40-07. Кентов, Сўзоқ — Рўзихон МАДАЛИЕВ. +7708-824-20-97. Тўлебий — Баҳорид ДЎСМАТОВА. 8(72547) 6-07-16. Қазигурт — Хуршид ҚЎЧҚОРОВ. +7-701-447-37-42. Сайрам — Зокиржон МҮМИНЖОНОВ. +7-702-278-96-90 Тупкибош — Мунира САЪДУЛЛАЕВА. +7-747-144-60-71.	
Бош муҳаррир ўринбосарлари: Муроджон АБУБАКИРОВ. Авазхон БҮРӨНБОВЕВ.		Муассис – Туркистон вилояти ҳокимлиги. Мулк эгаси – “Жанубий Қозоғистон” вилоят ижтимоий-сиёсий газетаси таҳририяти” масъулияти чекланган бироқарлиги.	
Масъул котиба – Шаҳноза УСМОНОВА.		● Мақолалар, эълон ва билдиривлардаги факт ҳамда далилларини тўғрилиги учун муаллифлар, реклама ва эълон берувчилар масъулдир. ● Фойдаланилмаган мақолаларга ёзма жавоб қайтарилмайди.	
Қозоғистон Республикасида тарқатилади.		Газета ҚР Маданият ва ахборот вазирлиги томонидан 2020 йил 21 апрелда рўйхатга олинди. КЗ34VPU0022503 гувоҳнома берилган. “ERNUR-print” МЧБ босяхонасида чоп этилди, Шимкент шаҳри, Т. Алимутов кўчаси, 22.	
		Нашр кўрсаткичи – 55466. Адади – 12100 нуска. Бўғим: 2749	
		МАНЗИЛИМИЗ: 160000, Шимкент шаҳри, Тауке хан шоҳқўчаси, 6-уй, 3-қават. Телефон: 53-07-10. Телефакс: 53-04-66. Электрон почта: janubiy@inbox.ru	
		Навбатчи муҳаррир: Хуршид ҚЎЧҚОРОВ.	